

INSIDIÆ

HUJATIUM SICARIORUM
HECTICÆ ET TABIS,

EX

SPECIALIORUM CAUSARUM INDAGATIONE,

DISSERTATIONE INAUGURALI MEDICA

HYGIOLOGICO - PATHOLOGICA

DETECTÆ,

QUAM .

AD MAJOREM DEI GLORIAM,

PROXIMIQUE SALUTEM

IN ANTIQUISSIMA ELECTORALI UNIVERSITATE
HEIDELBERGENSI

P R Æ S I D E

Prænobili, Excellentissimo, ac Experientissimo Domino

D. JOAN. LUDOV. CHRISTOPHORO
BERINGER,

Phil. & Medic. Doctore, ejusdémque Professore Publico

& Ordinario, h. t. Facultatis Medicæ Decano,

DOMINO MANUDUCTORE, PROMOTORE, AC PA-
TRONO SUO MAXIMO ÆTERNUM VENERANDO,

P R O L I C E N T I A

SUPREMAM DOCTORATUS MEDICI LAUREAM,

Annexaque Privilegia ritè consequendi

Publico ac solenni Eruditorum Examini submittet

ERHARDUS BENEDICTUS WEGELE,

Velburgensis Palatinus, Medicinæ Candidatus.

IN AULA ACADEMICA WILHELMIANI

Digitized by the Internet Archive
in 2019 with funding from
Wellcome Library

<https://archive.org/details/b30780342>

SERENISSIMO, POTENTISSIMO
PRINCIPI AC DOMINO,

DOMINO
CAROLO
PHILIPPO
COMITI PALATINO RHENI,
SACRI ROMANI IMPERII
ELECTORI,

ET

ARCHI-THESAURARIO,
BAVARIÆ, JULIÆ, CLIVIÆ, ET MONTIUM
DUCI, PRINCIPI MOERSIÆ, COMITI VELDENTIÆ,
SPONHEMII, MARCHIÆ, RAVENSPURGI,
DYNASTÆ RAVENSTEINII &c. &c.

Domino Domino suo Clementissimo.

NEC NON
SERENISSIMO PRINCIPI
AC DOMINO,
DOMINO
CAROLO PHILIPPO
THEODORO
COMITI PALATINO RHENI,
BAVARIÆ, JULIÆ, CLIVIÆ, ET MONTIUM
DUCI, MARCHIONI BERGÆ AD ZONAM, COMITI
VELDENTIÆ, SPONHEMII, MARCHIÆ, ET
RAVENSPURGI, DYNASTÆ IN RA-
VENSTEIN &c. &c.

Domino Domino suo Clementissimo.

*Dissertationem hanc Inauguralem humillimè
dedicat, consecrat*

*Devotissimus, subjectissimus, ac servorum
Infimus*

ERHARDUS BENEDICTUS WEGELE,
Velburgensis Palatinus.



DISSERTATIO INAUGURALIS MEDICA
HYGIOLOGICO - PATHOLO-
GICA
DE
INSIDIIS HUIJATIUM
SICARIORUM
HECTICÆ ET TABIS.

CAPUT I.

*Thema & Divisionem Dissertatio-
nis, nec non rationem scribendi
breviter exponit.*



Arœmia est malevolorum fortè in Medici-
nam, atque Medicos odio in vulgus passim
decantata, nempe: *agri curantur in libris,*
& moriuntur in lectis: atque ideò vitio haud
veritas, B. L., nos in seligenda Dissertationis Inauguralis
materia ab usitata hætenus methodo recedere, neque
pro Themate Disputationis morbum quemdam theore-

ticè, practicèque explicandum suscepisse; operæ namque pretium haud duximus, in simili argumento ex novaginta novem vel Practicorum scriptis, vel editis jamjam alibi Dissertationibus centesimum opusculum confarcinare, vel antiquam in nova olla cramben recoquere, vel denique, nescio quas, novas observationes, malè tamen non rarò observatas, aut saltem non ritè applicatas erudito orbi ut peculiaria inventa obtrudere.

Potius itaque talem materiam seligendam esse existimavimus, quæ salutis publicæ fortè consulere posset. Proinde Hecticam & Tabem in scenam producimus, non quidem, ut affectus hos morbosos juxta consuetam hætenus methodum scholasticam discursu Pathologico-Therapevtico explanemus, sed ut hos ipsos ceu Patrios hujatum præcipuè incolarum Sicarios contemplemur, eorūque insidias, quas conjurati hi hostes in Sanitatis Palatinæ perniciem clandestinè struunt, nos palam detegamus. *Sicarios* itaque Hecticam & Tabem vocamus, partim quia Sicariorum more non aperto Marte, sed clandestino quasi stratagemate charissimos Patriæ nostræ, hujatis potissimum urbis, incolas, quorum nobis cura salutisque cordi esse debet, invadunt: partim, quia sub suavibus, quas sensibus offerunt, blandimentis lethale venenum corpori sensim sine sensu communicant, donec incautos mortales lentâ quidem, interim tamen vix non semper inevitabili morte perimant, ut infra capite altero clariùs demonstrare nobiscum constituimus.

Hujates verò Sicarios prædictos affectus morbosos hac potissimum de causa dicimus, eò quòd Hecticam & Tabem præ cætera morborum caterva hujatibus præcipuè incolis fatalem esse deprehendamus, ita quidem, ut inter plures, qui diem supremum obeunt, non paucos,

cos, si non planè potiores, Hecticà aut Tabe laborâsse, vel saltem alios præcedentes morbos in Hecticam & Tabem degenerâsse, aut iisdem hectici quid supervenisse, imò ab ipso hoc malo tenerioris etiam ætatis infantes & juvenes utriusque sexûs minimè exclusos esse testis sit quotidiana vix non experientia, & attentior observatio clinica.

Quemadmodùm igitur observatio hæc, nempe hujates incolas præ cæteris populis ac morbis hecticæ potissimùm, ac tabidæ consumptioni obnoxios esse, satis in se certa est, ita eandem specialissimis omninò causis adscribi debere, inficias ibit nemo, nisi qui leviori animo anguem sub herba latentem in sinu porrò fovere mentis est. Hujus itaque rei specialiores causas capite sequente fusiùs sumus explanaturi, ut capite ultimo, quomodo saluti publicæ consulere, & Sicariorum nostrorum technas, insidias, ac machinas tantò feliciùs, aut prophylactica præservatione, aut, si malum necdum radicum sit, therapevtica etiam curatione eludere possimus, succinctè edoceamus.

CAPUT II.

Sicariorum Hujatum indolem, & insidias per specialium causarum indagationem exhibet.

ANtequam ad ipsam causarum Sicariis hisce nostris arma suppeditantium seriem devolvamur, ad meliùs eruendam harum notitiam, affectuum hectico-tabidorum hìc loci frequentius grassantium indolem præviè

térque ob oculos sistimus; de qua sequentes attentior observatio & experientia clinica nobis hæc tenus detexit circumstantias: *1^{mò}* affectus ejusmodi hæctico - tabidos sine ullo discrimine sexûs viros æquè ac fœminas invadere, quò ad ætatem verò *2^{dò}* pariter juvenibus utriusque sexûs æquè, ac intra consistentiæ terminos constitutis, nec non senibus vetulisque, quin ipsis etiam infantibus ac pueris communes esse, quamvis *3^{tiò}* tenerioris ætatis hominibus periculosiores, hinc & certius citiusque lethiferi sint. His accedit *4^{to}*, tabidæ aut hæcticæ ejusmodi consumptioni, qualis in hujatibus incolis crebrior occurrit, in aliquibus quidem veram phthysin, aut alterius cujusdam visceris labem, in aliis verò nullam sensibilem nobiliorum viscerum corruptionem scirrhosam aut apostemmatodem complicatam esse: ex quibus ultra spontè fluit *5^{to}*, eandem non æquè semper propriè & strictè dicta febre hæctica, aut consuetis hujus hæcticæ febris symptomatibus, quandoque etiam ne exactis quidem febrilibus paroxysticis exacerbationibus, nisi fortè ultimo morbi tempore, stipatam, sed frequentius in senibus marasmoideam, in junioribus tabi & atrophix universali similem esse. Unde porrò *6^{to}* extenuationem corporis similibus affectibus communem, non semper more febrium verè hæcticarum merè symptomaticam, sed persæpe magis idiopathicam esse existimamus, cujus opinionis infra hoc ipso capite in enarratione causarum continentium solidiores allegabimus rationes.

Ex peculiari hoc eoque Protheiformi Sicariorum nostrorum genio, velut ex præmissis necessariò nobis fluere videtur conclusio, nempe, quòd eos, de quibus in præsentì loquimur, affectus hæctico - tabidos, quemadmodum

modum nec certæ ætati aut sexui proprii, præterea etiam in ipsa periodo, & decursu non iisdem ubique circumstantiis stipati sunt, ita neque uni simplici, sed diversis omninò causis (talibus tamen, quæ in huiate præcipuè urbe, pro dolor ! sine periculi metu, imò pro deliciis admitti passim consueverunt) adscribere oporteat. Has itaque ut clariùs ob oculos ponamus, nolumus prolixam causarum genealogiam texere, censes, universum causarum harum ordinem duplici hac divisione exauriri posse, si causas alias in remotas & disponentes, alias in proximas & continentes dispescamus.

A priorum serie initium ducere placet, atque inter has generalem non nisi unam, amethodiam nempe circa diætæ regimen committi passim solitam, speciales autem plures, quas generale diætæ nomen Medicis sub titulo sex rerum non naturalium exhibet, allegamus; sunt autem sex res non naturales 1) aër, 2) cibus & potus, 3) motus & quies, 4) somnus & vigiliæ, 5) excreta & retenta, 6) animi pathemata. Quæ verò harum rerum, quales, & quomodo sub certis circumstantiis urbis nostræ incolas ad similes affectus disponere & viam sternere possint, in sequentibus percipiemus.

Aërem quidem hujatē quod attinet, tametsi ille nullius planè insalubritatis arguendus, quin potius ob puritatem suam apprimè commendandus sit, propter penetrantem tamen suam subtilitatem & raritatem iis, quibus præcordia firma non sunt, admodum sensibilis, & pulmonibus, præcipuè ab initio, donec successivè assuefiat, satis molestus esse solet; testes hujus rei complures viciniæ nostræ incolæ esse possunt, qui Mannhēmio huc devenientes Heidelbergensem aërem sine notabili pectoris angustia diu tolerare nequeunt, econtra

Mannhemii optimè se habent. Ratio hujus asserti in promptu est; quo enim aër purior, eò etiam magis est elasticus: quo plus autem elasticus est, eò non solum validius in pulmones irruit, sed etiam elastica sua expansione pulmones eò fortiùs premit (serenioris auræ mercurium in barometro pressione sua plus elevantis, aëris verò humidi & nebulosi eundem magis deprimentis exemplo) hac ipsa verò pulmonum pressione vesiculæ pulmonales plus justò distenduntur, materia acris in bronchiis hærens incarceration, sicque flebile phthysicorum beneficium, expectoratio materiæ viscido-purulentæ intercipitur, inde pectus magis aggravatur, respiratio fit laboriosior, verbo: pectus omnia sese habent in ejusmodi subjectis, in quibus pulmones labem aliquam aut saltem debilitatem contraxerunt.

Prætereà de aëre huiate, & nostro quidem judicio omnium maximè notari meretur, quòd, cum Heidelbergga præcipuè montibus undequaque obsita sit, aër inde valdè penetrans, tractibusque ventorum pervius (germani vernaculâ linguâ *eine schneidende / durchziehende / trucknende Lust* vocant) adeoque depascente quodammodo, colliquante, & exsiccante qualitate præditus, proinde subjectis athleticis succique plenis salubrior sit quàm gracilibus macilentis, iis præsertim, qui penuriâ humorum laborant. Absit verò, nos aëris huiatis salubritati quidpiam derogare velle, id saltem tenemus, aërem hujatrem remota quadam agendi methodo ad similes, de quibus loquimur, affectus symbolum suum contribuere, & dispositionem illam, quam fortè quidam alias ob causas ad hujusmodi extenuationem tabido-hecticam habent, insigniter adjuvare posse. Atque idcirco, ne aëri imputemus, quod justiori titulo depravato

vato gustui, luxuque hujus sæculi, nostris præcipuè incolis consueto adscribi deberet, ad cibi, potusque examen convertimur.

Cibum itaque quod concernit (siquidem incolarum hujatum multi ex inferioris Rheni tractu in Palatinatum sese contulerint, qui nativo vitæ generi & huaitibus in locis indulgent, quos non pauciores, imò plurimi nostrorum æmulantur) nihil sanè hic frequentius, usitatius, atque magis in deliciis est, quàm sub quolibet fermè prandio carnes fumo induratas, aut sale conditas, nec non farcimina ex bubula carne, fumo pariter exsiccata, multoque aromate condita &c. Westphalorum more mensis apponere : imò neque hoc sub prandio sufficit ; cœna etiam vix alia est, quàm sine prævia offa aut juscule ex frustulis de pernia, aut salitis ejusmodi, vel assatis etiam, sed refrigeratis carnibus, in orbe per circulum porrectis constans. Hujusmodi verò cibi cum gustui plurimorum apprimè arrideant, fit inde, ut libere etiam manu ingerantur.

Verùm, cum ejusmodi cibi (quod carnes quidem fumo induratas attinet) ita comparati sint, ut eorum succus gelatinosus maximam partem absumptus sit, indeque non solum difficulter concoquantur, digeranturque, sed etiam, licet facile digererentur, nihilominus parum laudabilis nutrimenti, plurimas è contra cruditates, chylumque crassioribus particulis terreis plurima sui parte constantem suppeditent, quoad carnes verò salitas, hæ iteratò assumptæ, uti vappidum chylum, sic salis humoris massæ dyscrasiam, nec non humorum lentorem successivè prognerent : nōne ex simili alimento vix non quotidiano, cæteris paribus, lentor & visciditas humorum, rigor & quasi exarescentia nervosa-
fibrosa-

fibrosarum partium, spissitudo sanguinis, indèque sensim emergentes oppilationes, infarctus, obstructions viscerum in emarcidam denique corporis consumptionem desinentes metuendæ erunt? præcipuè cum plurimi, quibus similia arrident fercula, sedentariæ vitæ vel otio dediti, vel saltem ita assueti sint, ut nihil minùs quàm grossius tale, multisque scatens cruditatibus alimentum laborioso vitæ genere, aut ad resolutionem ac digestionem requisita sufficiente corporis commotione subigere allaborent.

Neque aër solùm cibique sub his, quos modò allegavimus, respectibus ad affectus tabido-hecticos disponere possunt, sed etiam, & quidem præ modò dictis præsentius, imò, me iudice etiam frequentius, potulenta huiatibus incolis usualia, quæ duplicis sunt classis: primò nativa, qualia præcipuè sunt vina tam patria quàm exotica, & secundò arte facta, quo nomine potum Theæ & Coffeæ præcipuè intelligimus. Circa vina quidem errores diætetici, similibus malis fomitem subministrantes potissimùm respiciunt qualitatem & quantitatem. Circa potus autem arte factos supra dictos illegitimum usum, quem rectius genuino nomine abusum dixeris, reprehendimus. De utroque breviter.

Ac primo quidem, quod vina attinet, sive illa huiatia, aut exotica sint, ambobus tamen hoc commune fatum est, quòd perfrequenter sine modo & mensura non solùm ad satietatem, sed exundantem etiam sæpe numero ingurgitationem exhauriantur, hoc solo adjecto discrimine, quòd huiatia viliora (si pauca exceperis, sed quæ hoc ipso propter raritatem in communi regula vix exceptionem faciunt) à plebeis, exotica verò rariora ac generosiora (sed hoc ipso, si ultra debitam mensuram

ingur-

ingurgitentur, majore nocendi virtute instructa) à nobilioris conditionis hominibus expetantur. Interim corrupto hoc sæculi nostri more eò passim res devenit, ut ad æmulationem usque in Conviviis, cœtibûsque inter pocula certetur, turpisque in hoc quæratur victoria, ut unus alterum helluando vincat, melius dicas, suavi morte trucidet. Certè hoc de Patriæ nostræ incolis dixisse turpe foret, nisi notissima in vulgus parœmia esset:

More Palatino bibitur, ne gutta supersit,

Unde suam possit musca levare sitim.

Sed quam gravis inde sanitatis noxa pertimescenda sit, quàmque planam hujusmodi in poculis excessus ad tabidam, hecticàmque corporis extenuationem sternant viam, præcipuè in Junioribus, atque minùs assuetis, iis perceptu facile est, qui ex sacræ artis principiis fraudulentæ hujus matris insidiatrices noscunt filias hæmorrhagias, hæmoptyses, vomitus cruentos, phthyfes, œdemata, hydropises, & cæteros hujus classis morbos omnes ac sigulos in hecticam, tabemque corporis denique desinentes.

Immodicæ bibendi licentiæ, erroribûsque circa quantitatem aliud accedit vitium in hujatibus præcipuè vinis circa qualitatem, nempè quòd plebejæ saltem, civilisque fortis civitatis nostræ incolis usitatum sit vina juvenacula unius fermè necdum anni, imo ipsa etiam musta, in quotidianum, ordinariûmque potum dispensare. Quemadmodum verò hujatium vinorum plurima, teste chymico horum examine, multo acido, copiosisque terrestribus particulis, atque nativo crudo sulphure imprægnata sunt, certè tantò magis nociva, similésque, de quibus tractamus, affectus producendi capaciora erunt talis notæ recentia vina, quo minùs fermentata, proinde

innumeris hujus censûs impuritatibus conspurcata sunt. Quid autem aliud ex quotidiana ac ordinaria juven-
 lorum talium vinorum assumptione, quàm cruditates ac
 faburras primarum viarum, flatulentias, adstrictiones al-
 vi, minùs legitimum ordinariarum naturalium excretio-
 num, nec non digestionis nutritionisque successum, in-
 déque sensim sine sensu enascentes viscerum infarctus
 atque obstructions, hecticæ tabisque prodromos exspe-
 ctaveris?

A nativis ad ea transitum facimus, quæ arte pa-
 rantur, potulenta, inter quæ prærogativam tenent potus
 Theé & Coffeé, de quibus, cùm in vulgus passim notif-
 simi sint, prolixius hîc agere non est instituti præsentis
 ratio; id saltem intactum relinquere non possumus,
 quòd, uti in plurimis aliis, ita & in his plùs gustûs ob-
 lectamentum, quàm sanitatis præsidium modernis tem-
 poribus quærat, adeoque malefanus talium rerum
 abusus vix non ubique prædominetur. Et hic idem est
 abusus, quem in præsentiarum reprehendimus, incolis
 nostris nimis quàm communem; quomodo verò tam
 potus Theé, quàm Coffeé, si ultra modum & mensu-
 ram capiatur, ad affectus tabido-hecticos non leviter
 contribuere, ac disponere possit, ex sequentibus dispa-
 lescet.

Quemadmodum enim infusum Theé, si moderatè
 forbilletur, aquea sua humiditate crassos, viscidósque hu-
 mores diluit, naturalem ventriculi calorem adjuvat,
 blanda sua amaritie, & sale acido partim balsamicam ali-
 quam humoribus qualitatem largitur, partim fibras ven-
 triculi & intestinorum roborat, firmátque: ita è contrario
 in immodica quantitate, & saturatiore infuso assumptus
 eâdem aquea humiditate fibras tunicasque ventriculi ni-
 miùm

miūm relaxat, iisque atoniam conciliat; hinc ventricu-
lum debilem, adeoque digestionis officio (à quo primor-
dialiter dependet universum nutritionis negotium) in-
habilem reddit, copiosiore verò suo sale acido ac auste-
ro non modo lac, quod communiter infuso Theé admi-
sceri in magna quantitate solet, in caseosum magma
ventriculo molestum præcipitat, sed etiam, cum lym-
phæ gastricæ admiscetur, hujus acorem adauget. Hinc
nisi inter ipsum hujus potūs usum ventriculo etiam escu-
lenti quidpiam, in quod agat, concedatur, ipsas ventri-
culi tunicas aggreditur, easque quodammodo arrodit,
dapasçitque; ita, ut sectio anatomica, & observatio pra-
ctica talia subiecta, quibus largior infusi Theé potus in
vivis in usu fuit, non solum tabe consumpta, sed eorum
etiam ventriculi tunicas tenuioribus lamellis similes de-
monstraverit. Neque mirum; quantum enim hujusmo-
di ventriculi deperditio bonam concoctionem digestio-
nemque lædit, præpeditque, tantum pariter ad atrophico-
hecticam ejusmodi contabescientiam contribuit. Et
verò infusum hoc herbæ Theé, præcipuè illius, quam
Thee boy vocant, copiosum intra se continere sal acido-
austerum, res est avtopsiâ oculari & experimento ex-
temporaneo facillimè demonstrabilis: si namque infuso
Theé saturatori pauxillam etiam quantitatem vini cæ-
teroquin præstantioris instillaveris, illicò deprehendes,
infusum hoc in liquorem austero-acidum, aceto vulgari
non multum absimilem, degenerare.

Potum Coffeé verò quod attinet, circa hunc, uti
longè major, ac frequentior hujatibus incolis est abusus,
ita præ infuso Theé plūs etiam ad affectus tabico-hecti-
cos contribuit, cum namque oleoso sulphureo vaporoso
principio, & sale volatili, in gustum & obfactum cadente

gaudeat, certum est, hunc potum non omnibus indiscriminatim utilem, cholericis præcipuè etiam positivè noxium esse; quippe humores fortiter commovet, sanguinem orgasticè expandit, præcipuè autem nervoso generi inimicus est, uno instar omnium id comprobante experimento, quod ex largiori potûs Coffeè usu tremores artuum concilientur. Possemus in rei hujus testimonium allegare viros clarissimos, BOHNIUM præcipuè & WILLISIUM, pluresque alios, sed cum paginarum id non patiatur angustia, plura sciendi cupidum Lectorem ad MICHAELIS ALBERTI Dissertationem *de Coffeè potûs usu noxio* : Item ad Dissertationem DAVIDIS GOTTLOB HEROLD sub præsidio HIERONYMI LUDOLFF *de fabis Coffeè, earûmque sub infuso usu & abusu* : nec non ad anonymi cujusdam libellum, cui titulus : *Novi tractatûs de potu Caphe &c.* amandamus. Qui posterior author cap. 13. pag. 79. expresso capitulo edocet, quibus temperamentis & morbis potus Coffeè minùs idoneus sit. Nobis quoad nostram intentionem dixisse sufficiat, potum Coffeè ejusque sine ullo respectu ætatis, temperamenti, sexûsque hîc loci frequentiore abusus, etiam eò frequentiore causam dispositivam ad affectus tabido - hecticos constituere, quo validiùs genus nervosum afficit, à quorum tamen illibato statu (siquidem nervi partibus quibusvis solidis nativum suum, ac debitum robur, seu tensionem ac tonum impertiant, vî ejus in debita sua apertione & porositate servantur, sicque acceptum ab arteriis succum lymphalem nutritium decenter admittere, asservare, & in substantiam aliti convertere possunt) bona nutritio, adeoque ab iisdem male affectis macies, & extenuatio corporis maximam partem dependet.

Sunt hæc potiores circumstantiæ, circa quas diætetici hujatum incolarum errores committuntur, atque ex his ipsis sponte ea fluunt, ut morbosa producta, quæ in ulteriore sex rerum non naturalium examine, præcipuè circa se - & excretionum successum minus legitimum allegari possent, sed de quibus, ne Dissertatio ultra præfixos limites excurrat, hic tacemus; pro coronide tamen annectimus dispositionem illam ad hæcticam & tabem, quam in suprâ dictis rebus demonstrare allaboravimus, insigniter exinde adjuvari, imò quodammodo in actum deduci ex inertî, desidioso, & seditario vitæ genere, quo hujatum incolarum plurimæ, præsertim nobilioris fortis & sequioris sexûs personæ, immèdiatè fermè post pastum, vel lecto sese committunt somno indulgentes, vel inter ludendum aut confabulandum in seram usque noctem sellis velut clavis affixæ hærent, quod desidiosum vitæ genus, quomodo ad minus bonam digestionem, cruditates copiosas, spissitudinem sanguinis, lentorem humorum, obstructions viscerum, imò ad ipsam cachexiam, hujusque potissimum socias febres lentas, hæcticas, tabem, multum conferre possit, Medicis non solum, sed in vulgus etiam passim notissimum est; hinc ulteriore deductione vix indiget.

His postremò adjungimus hæreditariam dispositionem, quæ sanè, uti in reliquis morbis, sic & in affectibus hæcticojdeis nostratibus maximam meretur considerationem, siquidem totum hæreditariæ dispositionis negotium in similitudine motuum & temperamentorum, liberis cum parentibus communi fundatum est, adeoque infantes sub generatione easdem obtinent, quoad densitatem aut laxitatem, robur aut mollitiem solidarum partium fibras non solum, sed eandem etiam fluxilitatis

vel spissitudinis humorum conditionem, quibus parentes gaudent : necesse est igitur, ut similis quoque ordo, ac consuetudo motuum vitalium secretiorum, idemque viscerum vel robur, vel debilitas inde emergat, liberòsque ad eosdem, ad quos parentes inclinabant, affectus morbosos disponant; idque nobis videtur esse eò evidentius, quò plures nostros inter incolas tenerioris ætatis pueri ac puellæ, qui tamen in antedictis erroribus diæteticis vel nullos, vel modicos admiserunt excessus, ad tabidos nihilominus, hecticòsque affectus vel proximè dispositi, vel iisdem actu correpti esse deprehendantur.

Ex modo allegata causarum dispositivarum serie haud difficile est, causarum continentium nexum concinnare, quas quidem in priorum contextu jam sub generalibus terminis recensuimus; ut autem pressius ad affectuum hectico-tabidorum hujatibus incolis præ cæteris familiarium indolem accedamus, hìc repetendum existimamus, nempe quòd hi, de quibus nobis sermo est, affectus non iisdem in omnibus subjectis circumstantiis stipati sint, adeoque etiam non uni, sed diversis pariter causis continentibus adscribi mereantur. Enim verò, prout hic vel ille in una, alterave, aut etiam pluribus, aut singulis suprà dictarum causarum occasionalium abusu excesserit, etiam diversus effectuum inde dependentium genius, hinc diversus etiam affectuum dictorum decursus existat necesse est.

Specialiores itaque affectuum nostrorum hectico-tabidorum causæ continententes sunt sequentes : Et primò quidem enormis massæ humoralis falso - acida ad scorbuticam dyscrasiam accedens diathesis, quam extenuatio corporis consequitur, & illa quidem colliquationi
humor-

humorum, ex copiosis particulis salino-acidis, massam sanguineam nimium incidentibus, atque resolventibus, provenienti adscribenda. Causa hæc continens in iis præcipuè subjectis locum habet, quæ nulla strictè dicta hæctica febre, imò ne exactis quidem exacerbationibus febrilibus, multò minus consuetis hæcticae febris symptomatibus, sudoribus nempe aut diarrhæis colliquativis vexantur, sed fermè nihil, quàm continuam quidem, interim tamen languidam pulsûs celeritatem, sitimque immodicam persentiscunt, donec sub quotidiano & quasi ad oculum manifesto de die in diem corporis decremento sensim sine sensu lenta tabe depasti intereant.

Alteram causarum continentium in atonia, sive insigni quadam ventriculi præcipuè vicinarumque partium ac viscerum, ad bonam digestionem, & ab hac dependentem corporis nutritionem concurrentium relaxatione tonica quærimus; atque hanc non tam hæctica, quàm tabidæ pariter consumptionis causam in iis potissimum admittimus subjectis, quæ nullius cæteroquin corruptionis nobilioris cujusdam visceris vestigium exhibent, hinc fermè de nullis aliis symptomatibus, nisi de omnimoda solum appetitûs deperditione conqueruntur, ita quidem, ut præter tenuiora juscula vel nullum, vel paucissimum assumant alimentum, vel siquid etiam cibi capiunt, illud ventriculo molestum brevè post semi-digestum denuò per alvum secedat: in quibus certè hæc corporis contabescencia verè idiopathica est, nempe soli & unico debitæ nutritionis defectui, ex ventriculi, partiumque ad digestionem, nutritionemque contribuentium tonica relaxatione provenienti imputanda.

Tertium in ordine causarum continentium locum sibi vendicat viscerum, præcipuè chylicationis negotio destina-

destinatorum, nempe pancreatis, hepatis, lienis, & glandularum meseraicarum infarctus, atque obstructions, quas, nisi iisdem maturè prospiciatur, febres lentæ, in atrophicam corporis consumptionem abeuntes, pressò pede insequuntur.

Hisce denique accedit strictè dicta scirrosa, ulcerosa, & apostematodes pulmonum, cæterorumque in præcedente §. allegatorum nobiliorum viscerum corruptio, qui similes affectus, quemadmodum eum attigerunt gradum, ut solida cura amplius speranda non sit, ita formali etiam febre hectica, singulisque huic consuetis symptomatibus febrilibus, nempe circa vesperum potissimum gravius affligentibus alterationibus, nec non sudoribus, atque diarrhæis colliquativis, inevitabilis fati prodromis, stipati sunt. Interim nobis extra dubium positum esse videtur, modò dictarum causarum continentium unam alteramve, modò simultaneè plures eorum, de quibus hætenus tractavimus, affectuum hectico-tabidorum genetrices esse posse, idque ex eo fortè patescit luculentius, quòd, ut suprà diximus, antedicti affectus non ejusdem utrobique genii, diversisque in variis subjectis symptomatibus sociati esse deprehendantur. Id quod de causis dixisse sufficiat.

CAPUT III.

*Quomodo Sicariorum nostrorum
machine eludi, vulnera etiam inflicta, quantum
possibile, persanari possint, edocet.*

STitimus hætenus tuis, B. L., oculis Sicarios in perniciem patriæ sanitatis conjuratos, perspeximus eorum genium, deteximus insidias, ficas ipsas recenti adhuc dilectissi-

lectissimorum patriotarum sanguine conspurcatas penitus contemplati sumus. Superest, ut, quomodo eorum machinae vel subterfugiendae, vel pugiones, visceribus jam admoti, ex hostium nostrorum manibus extorquendi sint, edoceamus. Utrumque praesens praestabit capitulum. Quoad primum quidem, quomodo nempe nos ab affectibus hecticis, tabidisque praeservare possimus; certe hic plurimum valet illud Ovidii Nasonis monitum:

*Principiis obsta, sero medicina paratur,
Cum mala per longas invaluere moras.*

Cum verò in priori capite inordinatum circa dietam regimen, pro dispositiva ut plurimum causa assignavimus, & hujus amethodicae diateticae cum affectibus hecico-tabidis connexionem speciali contemplatione demonstravimus, hinc praeservationis fundamentum vix in alia re certius quaeremus, inveniemusque, quam si eorum, quorum priori capite abusum accusavimus, nunc legitimum usum pro antidoto commendemus.

Circa aërem itaque hujatem, iis videlicet, quorum praecordia non ita bene constituta sunt, tantò magis verò illis, qui actu labem aliquam, pulmonum praecipuè contraxerunt, iteratam hujatis cum Mannheimio aëre vicissitudinem, atque commutationem (de cujus commutationis salubritate, certis in affectibus, morbisque proficua, forsàn alibi differendi occasio dabitur) suademus, praecipuè tamen simul commendamus, ut pectus nullo non tempore ab injuriis aëris probè munire, aërem etiam matutinum atque nocturnum (siquidem is hic loci admodum sensibilis, ac penetrans esse solet) studiosè evitare allaborent.

Cibos quod concernit, de quibus praecedente capite locuti sumus, non equidem haec nostra mens est,

omnem eorum usum, utpote sanitati præjudicantem, planè infamem reddere, id saltem circa hunc monendum ducimus, ut is non tam frequenter atque copiosè, idque quidem sine discrimine temperamenti, consuetudinisque, in prandia, cœnasque dispensetur, aut, si hisce nihilominus assueti delectentur (de quibus HIPPOCRATES *Seçt. 2. aphor. 50.* docet, quòd, *quæ ex longo tempore consueta sunt, etsi deteriora, insuetis minus molestare soleant*) crudos saltem hujusmodi cibos, non solum proportionatâ potulentorum assumptorum copiâ quodammodo emollire, sicque ad digestionem aptiores reddere, sed laboriosa etiam, aut saltem protractiore corporis commotione, subigere studeant.

A cibis ad potulenta convertimur, circa quæ de vinis hujatibus æquè, ac exoticis certè optandum magis, quàm suadendum erit, ut graviores in his ingurgitandis excessus, cane pejus & angue, fugiantur, siquidem monente rursus HIPPOCRATE *Seçt. 2. aphor. 51. omne nimium natura est inimicum.* Vina itaque exotica generosiora non nisi post pastum largiorem, aut similia crudiora fercula, largiore manu ingesta, moderata dosi assumantur, idque magis phlegmatici, quàm cholericici aut melancholici temperamenti subjectis commendamus; recentiorum autem atque viliorum hujatium juveniculorum vinorum usum nemini prorsus suaserimus, nisi iis, in quibus necessitas legem non habet, & iis quidem satius erit aciditatem, atque lentorem hujatium vinorum vel intermixto, vel superbibito hujatium salubrium aquarum latice, partim diluendo, partim ad excretionem aptiora reddendo, contemperare.

Dum de hujatium aquarum salubritate mentionem fecimus, per parenthesis occurrit hujatium quorundam incolat-

incolarum opinio, quasi fons ille in hujate Electorali arce reperibilis (quem vulgò *das Fürsten-Brunnlein* vocare solent) peculiari gaudeat ad præservandos hæctico-tabidos affectus virtute. Pellexit inde nos curiositas, penitiùs huius scaturiginis aquarum chymicum instituire examen, quo variis tentatis experimentis, præcipuè evaporatione, aquam illam non modò levissimam purissimamque, verùm, variorum liquorum instillatione, subtilissima quadam terra martiali, blandissimo sale vitriolico, nec non spiritu quodam nitroso-aëreo, adeoque principiis leniter nitroso-sulphureo-martialibus imprægnatam, nullatenus verò terra quadam calcarea, aut grossioribus terrestribus, vel adstringentibus particulis conspurcatam deprehendimus. Exinde, licet specialissimum quemdam effectum, à similibus pathematibus hæctico-tabidis præservatorium, in hisce aquis commendare velle, nimix forsan credulitati obnoxium esset, id tamen certum est, has aquas, uti saluberrimas, ita non modicæ solùm ad conservandam hujatum incolarum sanitatem utilitatis fore, si inter cæteros potus non solùm in frequentiorem traherentur usum, sed etiam noctu præcipuè ante decubitum, ab iis præsertim paulò largiore haustu caperentur, qui falsedine scorbutica, & lentore humorum, alvi duritie, viscerumque infarctu, aut incipiente obstructione laborant, adeoque ex hisce causis ad affectus hæctico-tabidos præ cæteris dispositi sunt, quibus blando suo sale vitriolico, subtilissimamque martiali terra, egregiam ferre medelam posset. Sed de his modò claudatur.

De potibus arte factis Theé & Coffeé sequentes, circa eorum usum tibi cape cautelas, nempe quòd potum Theé cholericæ, melancholicæque complexionis

subjectis salubriorem esse censeamus, quàm phlegmaticis, à quibus proinde largiori, non tamen excessivâ dosi assumi poterit. Præterea verò, cùm infusum Theé multo acido imprægnatum esse supra meminimus, suademus hinc, ut, quibuscunque hunc potum largius assumere placet, non æque lac, quod una cum acido in Theé contento, liquori gastrico commixtum, in coagulum caseosum, ventriculo molestum facillimè abibit, huic infuso admisceant, sed potius vel antè, vel sub, vel brevè post infusi theé sorbillationem ad morem eorum populorum, quibus largior potus theé in usu esse solet, ventriculo esculenti quid concedant, in quod acidum in theé contentum agere, hinc non tam facilè ipsas ventriculi tunicas aggredi, atque lædere possit. Tanto magis verò noxium existimamus, si post potum theé in saturatione, ac largiore infuso assumptum, immediatè vinum, uti sæpissimè fieri solet, superbibatur, quod hanc potûs theé aciditatem non solùm auget, sed etiam eò validius tantoque certius exerit, quo magis potus theé saccharatus fuerit, supra allegato id comprobante experimento, quod proinde studiosè vitandum suademus.

Quod de infuso theé modò diximus, contrarium tenemus in potu Coffeé, videlicet illum phlegmaticis salubriorem esse, quàm cholericis aut melancholicis, in quibus sale suo volatili copioso massam sanguineam non modò orgasticè commovere, sed & vaporoso suo sulphure nervos insigniter afficere potest, idque tanto præsentius certiusque, quo cholericis præcipuè ex natura sua sunt sensibiliores. Eò salubriorem etiam hunc potum esse credimus, quo dilutior est, vel si paulo largiore lactis admixtione contemperetur, quàm si sub saturatiore infuso, quod plurimi hujus spotatores pro deliciis expetunt, assumatur.

Nul-

Nullatenus verò probamus eorum consuetudinem, qui statim post mensam ad sex, octo, pluresque phialas hanc potum assumunt, qui præstantiorem forte sensuri essent effectum, si una alterave phialia contenti essent.

Omniùm maximi verò nocuenti est pessima illa consuetudo, qua statim post mensam vel somno, vel lusui, sub diuturna sessione in seram usque noctem protracto, indulgetur, quod sanè bonam digestionem & elaborationem laudabilis chyli impedit, cui proinde vitio, & inde pendentibus sanitatis noxis, ad tabidam ejusmodi consumptionem sensim disponentibus, præcavendis satius erit, post pastum vel moderatiore laboriosa corporis exagitatione, vel in delicatis aliquantulum protractiore deambulatione occurrere.

Quandoquidem verò in hujusmodi rebus auscultatio potius optanda quàm speranda sit, iis, quibus similes circa diætam amethodiæ in deliciis esse consueverunt, specialiter recommendamus frequentem, imò in ditioribus etiam quotidianum sic dicti Elixirii Salutis ab Eminentissimo Cardinali CINFUEGOS publicæ utilitatis gratiâ typis divulgati usum, cujus, quia rarior est, uti Romæ in Collegio germanico præparari solet, genuina descriptio, peculiaris etiam utendi methodus, utrumque petentibus communicare non gravabimur, ex cujus iterato usu, quoniam polychrestum, temperatissimúmque est remedium, ex leniter evacuantibus, incidentibus, & resolventibus, antiscorbuticis pectoralibus, carminativis, tonicisque ingredientibus conflatum, præstantem contra sæpe dictos affectus effectum præservatorium speramus, atque spondemus.

Cæterùm præcipua indicatio præservatoria legitimum consuetarum naturalium excretionum successum

respicit, quæ ut pro subjectorum ipsarumque excretionum diversitate, in debito ordine & interrupta continuatione, conserventur, quilibet sanitatis suæ studiosus curare allaborabit. Hac itaque intentione vernaes autumnalesque corporis repurgationes, Venæ Sectiones, & Scarificationes, æquinoctialibus præsertim aut aliis etiam intermediis, sed naturæ tamen ejusdemque consuetis excretionibus proportionatis temporibus, administratas, nec non in iis, qui vel humoralis massæ aliqualem jamdum dyscrasiam, aut scorbuticam falsedinem, vel spissiores humores, ad viscerum oppilationes sensim disponentes habent, vel denique pectoris aliqualem debilitatem percipiunt, pro individui ratione, & judicioso Medici arbitrio selectas minerales aquas, Sedlicenses, Selteranas, Sualbacenses &c. (de quibus facilius in Patriam nostram transvehendis Natura ipsa duorum fluminum, Nicri Rhenique, concursu, incolarum nostrorum sanitati prospexisse videtur) debito tempore justaque mensura usurpandas commendamus. Et hæc de præservatione sufficiant.

Pro coronide itaque ad therapevticas indicationes progredimur, quæ causas continentes priori capite allegatas, utpote indicantia, respiciant necesse est, de quibus autem ante omnia notandum, eas ita comparatas esse debere, si therapevticæ curationi locus esse velit, ut necdum ad extremum sui gradum devenerint, quo in casu similium affectuum inveterato malo vix expectandæ efficacix remedium inveniendum, adeoque etiam vix solida cura amplius speranda est.

Quo ad primam proinde indicationem causarum continentium, falso - scorbuticæ nimirum humoralis massæ diathesi correspondentem, in hac, præmissis
univer-

universalibus, eò cura instituatur, ut primæ viæ à crudioribus fordibus liberentur, ut gastrici liquoris dyscrasia salino-sulphurea, vel falso-acida corrigatur, eadèmq̃ue operâ tota humorum circulantium massa edulcoretur, hoc est, à copia salinorum corpusculorum nimia repurgetur; quibus indicationibus ut satisfiat, non tam asyllum in acrioribus purgantibus, & vomitoriis drastice quærendum, quàm potiùs, præmissis lenioribus laxantibus, remediis, falso-acidam hanc humorum corruptelam alterantibus, ac temperantibus, eorum acrimoniam obtundentibus, eòsque per varia corporis colatoria successivè eliminantibus, diuturniori tempore insistendum est. Quo nomine varii generis decocta ex radicibus herbisque antiscorbuticis parata, vel juscùla etiam aut brodia similibus radicum, atque herbarum medicamentosa qualitate imbuta conducent. Præterea etiam non contemnendi usus erunt emulsiva ex amygdalis præcipuè parata, quæ præterquam, quòd æstus internus mitigent, humorum simul acrimoniam involvunt, ipsamque humorum colliquationem intercipiunt. His ad latus ponendæ sunt gelatinæ, aut brodia saltem gelatinosa, ex carnibus vitulinis, gallinaceis, rasura eboris, & cornu cervi, paucòque aromate parata, nec non feri lactis caprilli usus, ex quibus variæ formulæ concinnari, ac præscribi poterunt.

Ad alteram verò causarum continentium, atoniam nempe ventriculi, partiumque ad nutritionem concurrentium, præmissis itidem lenioribus evacuantibus, ea potissimùm in usum trahenda sunt, quæ partim blandum ventriculo calorem conciliant, partim relaxatis fibris pristinum vigorem, roburque impertiunt: prioris generis sunt vulgò sic dicta stomachalia & temperationa
aroma-

aromatica, ex quibus varia in officinis tam simplicia, quàm composita diversarum formularum prostant remedia. His accedunt, quæ partim spirituositate sua, partim strictè dicta tonica virtute ventriculi fibrarumque tonum roborant: prioris censûs sunt essentiæ stomachales ex supra dictis radicibus & herbis paratæ; ad posteriorem classem referuntur potissimum coralliata, succinata, martialia, antimoniata, item ex mastiche & gummatibus resinosis parata.

Tertiam in ordine causarum continentium infarctus atque obstructions viscerum esse diximus, in quibus præter infusa, & vina medicata ex radicibus herbisque aperientibus, intermixtis lenioribus laxantibus, rhabarbarinis præsertim parata, extracta amaricantia, vel salia vegetabilium fixa, nec non martialia temperatiora, præcipuè si hisce remediis aquæ destillatæ viscerales adjungantur, sacra anchora quærenda est, quibus etiam prædisposito corpore similes, quas supra recensuimus, minerales aquæ substitui possunt. Quorum omnium præcedentium indicationum specialia remedia, & formulas hîc allegare velle, cum & superfluum, & nimis tædiosum foret, qui pleniorum horum expedit Catalogum, videat JOANNIS JACOBI JANTKII MED. DOCT. *Selectûs materie Medicæ tabulam 16. 26. & 27.* sub aperientium, stomachicorum, & tonicorum titulo.

Ultimam denique attingimus indicationem, apostematicæ, aut scirrhosæ viscerum obstructioni auxilium ferentem: hæc ipsa equidem per legitimam remedium ante dictorum, viscerum infarctus & oppilationes deobstruentium, administrationem, præcavebitur. Quando verò vel abscessus exulceratio, aut scirrhus visceris jam in actum deductus, & consummatus est, hîc Artis Medi-

Medicæ viribus terminus positus est, adeoque, cum cura amplius speranda non sit solida atque genuina, palliativa saltem, symptomatumque alleviatio, quantum possibile, tentanda est, quod in phthysicis quidem, quamvis alii in fungo salicis, alii in Cascarillæ ejusque Extracti aut Tincturæ diuturniore usu, specialem quendam effectum se expertos fuisse affirmant, quod ulterioribus experimentis relinquimus, maximè tamen blanda expectorationis materiæ viscido-purulentiæ promotione, per pectoralia temperatiora, in his etiam, uti pariter in cæteris omnibus, in quibus hæctica consummata est, vix aliis, quàm cordialibus & analepticis impetrandum est, quæ, uti Medicorum cuilibet notissima sunt, ita diffusior horum enarratio nobis superflua videtur; quibus proinde dissertationi præsentī coronidem imponimus. Faxit Deus Ter Optimus Maximus, ut, quæ in hac contenta sunt, cedant ad Majorem Divini Nominis Gloriam, nec non Dilectissimorum nobis Patriotarum salutem & emolumentum; Utrumque enim fuit Dissertationis præsentis, nostrique laboris

FINIS.

AD ZOILUM.

*Scripta hæc auditor spernat, lectorque recuset,
Lector & auditor nec mihi quisque placet.*

DISPUTATIONIS UPERIOR MATERIA.

1. *Qui Theoria ignari, sub Medicorum larvâ praxin Medicam exercent, hâcque de causâ dogmaticorum Medicorum consortium fugiunt, non Medici, sed Medicastri sunt, qui turpe hoc privilegium cum Carnificibus commune habent: Quod iis liceat impunè occidere.*
2. *Uterque parens, neque ad formationem, neque ad vivificationem Embryonalis corporis aliquid directè contribuit.*
3. *Unde homo strictè loquendo solùm gignitur, non generatur à parentibus.*
4. *Febres qualescunque etiam Pestilenciales, morbi dici simpliciter non possunt.*
5. *Sphacelus, & Mors essentialiter non differunt.*
6. *Neque ex morbo principali, nèque ex symptomatibus primariis Medico desumenda sunt indicationes; quæ generaliter spectata in omnibus morbis prorsus eadem sunt.*
7. *Unde eâdem etiam generali methodo omnes interni morbi curari possunt.*
8. *In hydrope neque diuretica, neque hydragoga, neque ipsa Paracentheses aliquid directè prosunt ad curam.*
9. *Hæmoptoicis conveniunt sudores, etiam largiores: iis tamen ponsitivè nocent sudorifera.*
10. *Nulla dantur specifica, vel quoad certos morbos, vel quoad peculiares humores educendos.*
11. *Inflammatiô formaliter spectata qualiscunque non fit à materia corrupta, acri, irritante.*
12. *An Medicus Christianus, & rationalis Curas sympatheticas cum bona conscientia adhibere possit, Problema esto.*

QUas struat infidias, & cur clam retia tendat
 Hectica, quæ lentâ corpora tabe terit.
 Cûrque Palatinis Hostis grassetur in oris,
 Et quo quis possit Marte fugare, doces.
 Vergat ut hoc multis ægris, exopto ! saluti ;
 Sic merito Victor Nobilis Hostis eris.

Amicæ gratulationis ergo hæcce
 scribebat

JOHANNES BLANCKENHORN,
 Francothal. Palatin. Med. Caudit.

EUge bonum factum ! terrâ jactatus, & alto
 Tandem Nauta solet lætus adire lares !
 Euge bonum factum ! post dura negotia *Nostro*
Wegelio dignus splendet honoris apex !
 Aspice ! parta quies, & gloria nacta cacumen
 Emerito pridem lauta brabea ferunt.
 Gratamur meritò, meritò gratantur *Amici*,
 Verbâque voce sonant, votâque mente strepunt.

Hisce brevibus sed sinceris Clarissimo Domi-
 no Defendenti, Amico suo ex paucis di-
 lectissimo fausta quævis precari, ut de-
 buit, voluit.

JOAN. PHIL. FABER, M. C.
 Heidelbergæ Palatinus.

QUO *veheris* cerebro SOBOLES enixa MINERVÆ ?
Arces Hungarici num mens lustrare *Gradivi* ?
Lustrâsti. Hicce *tuis* quo tendit *currulus* ergo,
 Quem *Lucina* dedit TIBI, quem labor improbus egit ?

Currulus ad CATHEDRAM tendit, mihi tempora docta
 Quæ cinxisse juvant, sic laurea ferta loquuntur.
 Post exantlatos *quarta* jam *messe* labores
 Nunc meritò PALLAS tantos largitur honores,
 Queis me devoveo TIBI, nec nisi nescia flecti
 Atropos hosce meos à te mihi solvet amores.

Ita accinente & applaudente

J. C. A. P. MERCKEL, J. U. Stud.

Æ Grotis Medicina solet reparare salutem,
 Expertâ Medici prospiciente manu.
 Tubenè, nam constat, memoratâ excellis in arte,
 Ergo fac, ægrotos prosperitate frui.
 Noxia corporibus contagia multa supersunt,
 Sic Medicamentis præveniatur eis.
 Has igitur facies depellere corpore pestes
 Det Deus effectus artis ubique bonos.

neo - DoCtoranDo gratVLabVnDVs Plè &
 IVstè apposVIt

IOANNES VVOLPERTH,
 Chirurgus Juratus & Professor Anat
 omiæ Universitatis.

